

Ai dande ta deseabo un bon anja nobo...



Diowijk ta morto.

Cunele a despase un pida Aruba i ta solamente e rekwèrdo di su storianan ta biba den mente di esunnan, ku a konosele i ku a disfrutá di su fantasía indomable. Como mucha mi ta kòrda kon atardi ora solo baha Diowijk, den su stul di sosiego, ta konbersá den alta bos pa tur mundo tende i e muchachadanan pa un rato ta laga nan wega para pa skucha kon Diowijk a krusa lamá pa bai kòrta kanjabrabo na Cuba, of kalke otro hasaña sobresaliente di e díanan di antes.

Asina mi ta kòrda kon un dia tardí den tempo di aña nobo, nos muchanan parew, preparando pa bai kore dande, tabata hasiendo desordu ku bleki bashí di kerosín te ora e stèm di Diowijk a pone fin na tur nos músika: "Muchanan no hasi bofón di dande pa no pasa boso loke a pasa Shon Jacobo defunto".

Den e atardeser e stèm ronko ku a bisa esaki tabata nada mas ni menos ku un inbitashon pa skucha un storia deskonosí i fantástiko i ku e tempo ei a hasi asina un impreshón ariba mi ku te awe pasku i aña nobo no por dreña sin ku nan trese e storia aki na mi memoria.

„Ta kende e Shon ei ta, Diowijk?”

„Konta nos ta kiko a pasele”.

Ya kaba nos tur tabata sinta rònt di su stul i un bes mas nos por a gosa di e fantasía fértil di Diowijk.

„Boso tur konosé e tereno den besindario di hospital ku hendenan ta yama felt di habrák. Wel einan antes Shon Jacobo tabata biba i si boso a ripará bon e luga ei ta koko pelón manera mi kabés, ni yerba no kièr krese einan. Esei ta e kastigo di dande.

Shon Jacobo tabata un hòmbler riko, un komersiante ku diferente tienda den stat, pero pa tur su rikesa e tabata masha pichiri tambe.

E tabata biba su so den un kasita biew ariba gelt di habrák i den su kurá algun kachó grandi brabu tabata kwida su kas pa ladronnan no bin hòrta su plaka. Hendenan tabata konta kon tur anochi Shon Jacobo tras di e lus di un bela ta konta su plaka i ku esaki tabata su úniko alegría den bida. Sin piedá tur su sinko sintí tabata dediká na plaka i mas plaka i ningun hende, kon pober ku nan por ta, el'a yega di hasi felís, ni ku un sonrisae kòrda ku un depchi.

Díanan di pasku i aña nobo a dreña i ya tur mundo tabata sinti e alegría di e fiestanan benidero, menos naturalmente Shon Jacobo ku a pone mas kachó pa kwida su kas pasobra según e, den luna di desèmber nan ta hòrta mas ku nunca. Pa Shon Jacobo e fiestanan di fin di aña tabata un pèrdida di plaka ya ku su trahadornan ta haña algun día liber i no lo traha mata nan kurpa p'ele manera resto di aña.

Pasku a bini, pasku a bai i asina e momento a yega pa saludá e

aña nobo i bisa e biew ayó. 12'or di anochi a dal i mundo parse tabata bai rementá ku klapchi i dònnerbos, virpeilnan tabata luminá shelo i tur kaminda bo por a weita dande trese nan "ai nobé".

Pero no ta tur kaminda tin hende ku bon kurasón pa dande, pasobra ora e dande a yega na porta di Shon Jacobo nan a haña un gumá i striká: hende burachi no por desea nada! en bes di kanta i balia manera makako boso por a bai buska trabòw di hasi, . . . i mas kos desagradábel Shon Jacobo a deseá e dande i ora el'a kaba di zundra el'a dal e porta. Awor segun hendenan ta konta, e dande a bai fei kas di Shon Jacobo kantando na un tono straño:

Shon Jacobo, dande lo' nabo hopi plaka i rikesa, ai nobé.

E anochi ei tabata e último anochi ku nan a weita Shon Jacobo na bida. Pa su mañan tempo tabata na awa i tur hende tabata warda aña habri ku un bon palo di awasero. En berdat, no a dura hopi ku awa a kuminsa kai ku gotanan di pipita di kenepa. Tabata parse ku shelo mes lo bini abòw, pero turestén ku henter Aruba tabata haña awa, solamente ariba kas di Shon Jacobo plaka grandi di oro tabata kai.

Ora pueblo a ripará esaki un multitud enorme ku hèmchi na man a aserká e kas di Shon Jacobo pa por disfrutá tambe di e yobida milagroso aki. Pero Shon Jacobo, loko pa plaka ku e ta, mesora a lès tur e kachónan den su kurá i nan a kuminsa blaf di un moda asina ferós ku tur hende a keda paralisá na un bon distansha di e kas.

Asina pa oras i oras e hendenan a keda para pafó den awasero weitando kon Shon Jacobo ta bira mas i mas riko. Ya kaba e kurá di e kas tabata yen i e dak a kuminsa krak bòw di e peso di e kantidat enorme di oro ku tabata tin ariba djé, te ora ku e no por a wanta mas i ku un ruido desastroso e dak a bini abòw derando Shon Jacobo bòw dje oro ku tanto e la stima den su bida. Hendenan ku tabata pafó a konta ku ora e dak di Shon Jacobo su kas a kibra nan a tende un grito horibel i mesora despwés un silencio profundo. E kachónan a stòp di blaf, hunto ku e awasero, manera ku ta un òrdu a wòrdu kumplí.

Despwés di hopi rato esunnan ku tabata tin mas kurashi a bula kurá bai padén. E kas di Shon Jacobo tabata un ruina, manera ku un piedra imenso a kai ariba djé. E kachónan tabata drumi trankilo i ningun kaminda e hendenan por a deskubrí ni sikiera un plaka di oro.

Fei di e dia aki na Ruba nos tat trata dande ku rèspèt".

Despwés di masha rato nos a lanta di abòw i tur aturdí di e storia misterioso aki nos a koi kaminda di kas, lagando tur bleki di kerosín atrás pa jamás bai kore dande.

D. Henriquez ■

